



## ՔՐՄԱԿԱՆ ԴԱՍԸ ՀԻՆ ՀԱՅԱՍՏԱՆՈՒՄ

Հին Հայաստանում գերագույն իշխանության մարմնացումը ինքը՝ հայոց թագավորն էր: Սակայն նրա կողքին և նրա հետ միասին գոյություն ուներ ավագանու մի դաս, որը խոշորագույն դեր էր խաղում երկրի քաղաքական, տնտեսական և մշակութային կյանքում: Այդ քրմերի դասն էր:

Նախաքրիստոնեական Հայաստանում քրմական դասի գոյության և նրա ունեցած քաղաքական ու տնտեսական կշռի մասին մի շարք արժեքավոր վկայություններ պահպանվել են Ագաթանգեղոսի, Մովսես Խորենացու և Հովհան Մամիկոնյանի մոտ, ինչպես նաև Արմավիրի ու Գառնիի հունարեն արձանագրություններում: Այդ առնչությամբ որոշակի մի ակնարկություն կա նաև Պլուտարքոսի հեղինակած Լուկուլլոսի կենսագրության մեջ<sup>1</sup>: Ավելի առատ են Հայաստանին հարևան երկրների քրմական դասին վերաբերող տվյալները, որոնց հեղինակը, հիմնականում, Ստրաբոնն է: Այդ վկայությունների համեմատումը Հայաստանին վերաբերող տվյալների հետ, մեզ համոզում է այն բանում, որ թե՛ Հայաստանի և թե՛ նրան հարևան երկրների հասարակական կյանքում բացառիկ մեծ էր քրմական դասի դերը:

Այսպես, Ստրաբոնը, խոսելով Կապպադովկիայի Կոմանա տանարային քաղաքի մասին, վկայում է, թե «քաղաքի բնակիչները կատառնացիներ են, որոնք իբր ենթարկվում են թագավորին, բայց առավել հնազանդ են քրմին: ...Ընդհանրապես, թագավորից հետո քուրմը երկրորդ անձնավորությունն է Կապպադովկիայում. մեծ մասամբ նույնիսկ թագավորներն ու քրմերը պատկանում են միևնույն տոհմին»<sup>2</sup>: Նույնպիսի իրավիճակ է պատկերում դարձյալ Ստրաբոնը, խոսելով Պոնտական Կոմանա քաղաքի մասին, որտեղ քուրմը «համարվում էր իր կարևորությամբ երկրորդ դեմքը թագավորից հետո»<sup>3</sup>: Նման դրություն էր նաև Ադվանքում, որտեղ «քրմական պարտականությունները կատարում է թագավորից հետո ամենահարգված դեմքը»<sup>4</sup>:

Անկասկած, Հայաստանում ևս նույնպիսի հարաբերություն եղել է թագավորի և քրմական դասի միջև, ինչ վերոհիշյալ երկրներում: Այդ պարզո-

<sup>1</sup> Plutarchi Lucullus, XXIV, 2—8.

<sup>2</sup> Strabonis Geographica, XII, 2—3.

<sup>3</sup> Անդ, XII, 3, 32:

<sup>4</sup> Անդ, XI, 4, 7:

րոշ հետևում է Մովսես Խորենացու վկայությունից, որի համաձայն Երվանդ Վերջինի թագավորության տարիներին Հայաստանի քրմապետ էր կարգված թագավորի եղբայր Երվազը<sup>5</sup>։ Մեկ այլ անգամ, պատմելով նույն Երվանդի ջախջախման մասին, պատմահայրը դարձյալ վկայում է, որ Արտաշեսի կարգադրությամբ սպարապետ Սմբատ Բագրատունին կործանում է նաև Բագարանում քրմապետ Երվազին և նրա փոխարեն «ի վերայ բագնացն կացուցանէ զընտանի Արտաշիսի»<sup>6</sup>։ Հետագա դեպքերի ընթացքը շարադրելիս, Խորենացին պատմում է, թե Արտաշես արքան իր որդի Մաժանին «կարգէ քրմապետ ի յԱնի դիցն Արամազդայ»<sup>7</sup>։ Խոսելով Վահունի քրմների մասին, որոնք իրենց համարում էին Վահագնի սերնդից, Խորենացին հաղորդում է, որ Վաղարշակ արքան նրանց է հանձնարարում քրմության պաշտոնը «և կարգէ ընդ առաջին նախարարութիւնսն»<sup>8</sup>։

Մեր այն ենթադրության օգտին, թե Հայաստանի քրմապետը ևս սերում էր արքեանի տոհմից, խոսում է նաև Տակիտոսի վկայությունն այն մասին, որ հայ Արշակունիների արքայատոհմի հիմնադիր Տրդատ Ա թագավորը (66—80 թթ.), միաժամանակ նաև քուրմ էր։ Հոռմայեցի մատենագիրը պատմում է, որ Հոռմի և պարթևների միջև տեղի ունեցող բանակցությունների ընթացքում, ի պատասխան կայսր Ներոնի պահանջին, որի համաձայն Հայաստանի գահի պարթևական թեկնածու Տրդատը պետք է Հոռմ ներկայանար անձամբ, արքայական թագը կայսեր ձեռքից ստանալու համար, պարթևական թագավոր Վաղարշը, Տրդատի ավագ եղբայրը, գրում է Ներոնին. «Տրդատը չէր հրաժարվի Հոռմ գալով թագն ընդունելուց, եթե նրան չխանգարեին քրմական պարտականությունները»<sup>9</sup>։ Այդ առթիվ Գառնիի հունարեն արձանագրության առաջին երկու՝ ΗΑΙΟΣ ΤΙΡΙΔΑΤΗΣ բառերի շուրջ մեր կատարած դիտողություններից եզրակացրել ենք, որ այդ բառերից ΗΑΙΟΣ-ը եղել է հիշյալ արքայի տիտղոսը կամ հավելանունը իբրև քրմի, իսկ ΤΙΡΙΔΑΤΗΣ -ը՝ նրա անձնական թագավորական անունը<sup>10</sup>։

Փոքր Ասիայում և Հայաստանում հայտնաբերված վիմագրական նյութը ևս մեզ իրավունք է տալիս պնդելու, որ քրմերը հելլենիստական միապետությունների պետական գործերում խաղում էին նշանակալից դեր։ Նշենք երկու օրինակ՝ մեկը Փոքր Ասիայից, մյուսը Հայաստանից։

Պերգամոնի թագավորներ Եվմենես Բ-ն և նրա հաջորդ Ատտալոս Բ-ն մ.թ.ա. 163—156 թթ. աշխույժ գործարար նամակագրություն վարեցին Գալատիայի Պեսինունտում գտնվող Կյուրեղեի տաճարի քրմապետ Ատտիսի հետ։ Վիմական արձանագրությունների ձևով մեզ են հասել հիշյալ թագավորների յոթ նամակ, ուղղված քուրմ Ատտիսին, որոնց բովանդակությունը վկայում է, որ երկու կողմերը համատեղ քննարկում են պետական կարևորագույն նշանակության գործեր<sup>11</sup>։ Ժամանակի քաղաքական իրադրության հետնախորքի վրա առավել հստակ է ընդգծվում այն դերը, որ խաղում էր

<sup>5</sup> Մովսես Խորենացի, Բ, խ։

<sup>6</sup> Անդ, Բ, խը։

<sup>7</sup> Անդ, Բ, ծգ։

<sup>8</sup> Անդ, Բ, ը։

<sup>9</sup> Taciti Annales, XV, 24. Հմմտ. C. Plinii Naturalis Historiae, XXX, 6, 1.

<sup>10</sup> Ս. Մ. Կրկյաշարյան, Եվս մի անգամ Գառնիի հունարեն արձանագրության մասին,

«Պատմա-բանասիրական հանդես», 1965, թիվ 3. էջ 235—238։

<sup>11</sup> C. B. Welles, Royal Correspondence in the hellenistic period (այսուհետև՝ RC), New Haven, 1934, No. No. 55—61.

քրմապետ Ատտիսը կենտրոնական Փոքր Ասիայի պետությունների փոխհարաբերության մեջ: Մագնեսիայի ճակատամարտում և դրա ելքը արձանագրած Ապամեայի պայմանագրով Հոտմը և նրա դաշնակից Պերգամոնի թագավոր Եվմենես Բ-ն ծանր հարված հասցրին Առաջավոր Ասիայի խոշորագույն տերությանը՝ Սելևկյան կայսրությանը, որից հետո Սելևկյանները դադարեցին ասիական գործերում որևէ կարևոր դեր խաղալ: Նրանց տեղը միջազգային կյանքում փորձում են գրավել Պերգամոնի թագավորները, Եվմենեսն ու Ատտալոսը: Սակայն այդ ձեռնտու չէր Արևելքում իր նվաճումներն սկսած Հոտմին: Համաշխարհային տիրապետության ձգտող Հոտմը չէր թույլատրում ոչ մի տիրակալի, անգամ իր երեկվա դաշնակից Պերգամոնի թագավորին, արտաքին քաղաքականության մեջ որևէ չափով ինքնուրույնություն դրսևորել: Երբ Եվմենեսը փորձեց ի հաշիվ սահմանակից Գալատիայի, որտեղ քրմապետ էր Ատտիսը, ընդլայնել իր տերության սահմանները, հակառակ գալատների դեմ պատերազմում Եվմենեսի տարած հաղթանակին, Հոտմի ծերակույտը, ի հեճուկս Եվմենեսի շահերին, Փոյուգիայում հաստատված գալլական ցեղերին շնորհեց ինքնավարություն: Այդուհանդերձ, Պերգամոնի թագավորները չէին հրաժարվում Գալատիան նվաճելու իրենց մտադրությունից: Նրանք, սակայն, չէին համարձակվում բացահայտ հանդես գալ Հոտմի կամքի դեմ: Հանձին քուրմ Ատտիսի, Պերգամոնի թագավորները հավատարիմ դաշնակից էին գտել: Եվմենեսը Կյուրեղեր տաճարի քրմապետի օգնությամբ, Հոտմի ծերակույտից գաղտնի, շարունակում էր թշնամական գործողությունները Գալատիայի դեմ: Եվ սա մեծ հանդգնություն էր: Եթե աշխարհակալության ձգտող ամենագոր Հոտմը տեղեկանար այդ գաղտնի տարվող բանակցությունների մասին, պարզ է, որ շնորհակալություն չէր հայտնելու Պերգամոնի թագավորներին: Այս հանգամանքը մի անգամ ևս մեզ համոզում է, որ Պեսինունտի քրմապետ Ատտիսը մեծ վստահություն էր վայելում Պերգամոնի թագավորների մոտ:

Արմավիրում հայտնաբերված հունարեն արձանագրություններից մեկը ևս (երկրորդ քարի առաջին արձանագրությունը) մի արժեքավոր վավերագիր է այն մասին, թե քրմապետը Հայաստանում գտնվում էր թագավորի հետ գրեթե հավասար աստիճանում (նա իրեն անվանում է „ΒΑΣΙΛΕΥΣ“): Այս արձանագրությունը Հ. Մանանդյանը հիրավի դիտում է որպես Արմավիրի հեթանոսական տաճարի քրմապետ Միթրասի նամակը Հայաստանի Եբրոնտես թագավորին: Հատկանշական է, որ արձանագրության մեջ Միթրասն իրեն անվանում է նույնպես թագավոր, ինչ և Եբրոնտես-Երվանդին: Հանգամանք, որը վկայում է ոչ միայն նրա բարձր ծագման, այլև այն մասին, որ նա թագավորի կողքին և նրա հետ միասին կարևոր դեր էր խաղում պետական գործերում<sup>12</sup>:

Վիմական այս տվյալներից և Խորենացու վկայություններից վստահ կերպով կարելի է հետևցնել, որ քրմապետը Հայաստանում ևս, ինչպես և հարևան երկրներում, երկրորդ դեմքն էր թագավորից հետո. երբեմն քրմապետի պարտականությունները նույնիսկ միահյուսվում էին թագավորի պարտականություններին և նույն անձը հանդիսանում էր միաժամանակ թագավոր և քրմապետ, ինչպես այդ պարզվում է Գառնիի հունարեն արձանագրությունից և Տակիտոսի հաղորդումից:

<sup>12</sup> Հ. Հ. Մանանդյան, Արմավիրի հունարեն արձանագրությունները նոր լուսաբանությամբ, Երևան, 1946:



տեղի և բարեբեր տաճարային հողամաս, որը քրմին տալիս է տարեկան 15 տաղանդի եկամուտ»<sup>17</sup>: Համարյա նույն պատկերն է նկարում Ստրաբոնը, խոսելով պոնտական Կոմանա քաղաքի մասին<sup>18</sup>:

Մեկ այլ տեղ Ստրաբոնը, խոսելով իր ծննդավայր Ամասիա քաղաքի մոտ գտնվող Զելե քաղաքի մասին, նշում է, որ այնտեղ կառուցվել է Անահիտ դիցուհու տաճարը, որին մեծարում են նաև հայերը, որ տաճարային ծառաների թիվը և քրմերի վայելած հարգանքն ու պատիվը թագավորի կողմից նույնպիսին էր, ինչպիսին ինքը նկարագրել է հայերի մոտ Անահիտի պաշտամունքի մասին խոսելիս: Այնուհետև հույն մատենագիրն ավելացնում է, որ պարսից արքաները «հնում Զելեն համարում էին ոչ թե քաղաք, այլ պարսից աստվածների սրբատեղի: Քուրմը ամեն ինչի տերն էր: Այն բնակեցված էր բազմաթիվ տաճարային ծառաներով և քուրմը շատ հարուստ էր: Սրբավայրի շրջապատում կար ոչ քիչ սրբազան հող, որը պատկանում էր քրմին»<sup>19</sup>: Նույնն էր իրավիճակը նաև Ադվանքում: Խոսելով այնտեղ բնակվող ցեղերի մասին, Ստրաբոնը դարձյալ գրում է. «Նրանք իբրև աստվածների պաշտում են Արևը, Զևսին և Լուսինը: Սրա տաճարը գտնվում է Իբերիայից ոչ հեռու: Քրմական պարտականությունները կատարում է ամենահեղինակավոր անձը թագավորից հետո: Նա կանգնած է սրբազան հողի գլուխ, որն ընդարձակ է և լավ բնակեցված, ինչպես նաև գլխավորում է տաճարային ծառաներին»<sup>20</sup>: Իբերիայի բնակչության չորս դասի բաժանված լինելու մասին Ստրաբոնի հաղորդումից<sup>21</sup> պարզվում է, որ այնտեղ ևս քրմական դասը խոշոր դեր է ունեցել երկրի քաղաքական կյանքում:

Ստրաբոնի ժամանակ եթե այդպիսին էր դրությունը Հայաստանին սահմանակից երկրներում, ապա ոչ մի հիմք չկա կասկածելու Հայաստանում ևս նման հարաբերությունների գոյության մասին:

Այսպիսի իրավիճակը, երբ քրմապետը համարվում էր թագավորից հետո ամենահեղինակավոր անձնավորությունը, շարունակվել է նաև քրիստոնեությունը Հայաստանում որպես պետական կրոն հաստատվելուց հետո: Միայն այսպես կարելի է հասկանալ Փավստոս Բուզանդի այն պատումը, որի համաձայն, երբ բյուզանդական Վաղես կայսրը որոշում է մահվան ենթարկել իր մոտ ժամանած հայոց Ներսես կաթողիկոսին, կայսեր մերձավորները խորհուրդ են տալիս չանել այդ, քանզի Ներսեսը մեծ ու ավագ մարդ է «և աշխարհի միոյ գլուխ: Զի թագաւորն դոցա աշխարհին և դա, որպէս ասեն, ընդ մի համար են»<sup>22</sup>:

Ինչպես Փոքր Ասիայի երկրներում, այնպես և հին Հայաստանում, որոշակի համերաշխություն կար թագավորական իշխանության և քրմական դասի միջև: Դրա յուրահատուկ արտահայտությունը մենք տեսնում ենք Մորիմենա քաղաքում գտնվող Վենապյան Զևսի տաճարի քրմի մասին Ստրաբոնի այն վկայության մեջ, թե «այն քուրմը ցկյանս է, ինչպես և Կոմանայի քուրմը»<sup>23</sup>: Հետևաբար, ինչպես ցկյանս էր թագավորի իշխանու-

<sup>17</sup> Անդ, XII, 2, 5:

<sup>18</sup> Անդ, XII, 3, 32:

<sup>19</sup> Անդ, XII, 3, 37:

<sup>20</sup> Անդ, XI, 4, 7:

<sup>21</sup> Անդ, XI, 3, 6:

<sup>22</sup> Փավստոս Բուզանդ, Դ, ե:

<sup>23</sup> Strabo, XII, 2, 5.

թյունը, այնպես և ցկյանս էր քրմական պաշտոնը: Հավանական է, որ թագավորն իրավունք է ունեցել խախտելու այդ կարգը և զրկելու քրմերին իրենց պաշտոնից: Մեզ հայտնի է Խորենացու մի վկայությունը, որի համաձայն Տիգրան թագավորը «ցասուցեալ ընդ Վահուիսն,... ընկեանու գնոսա ի քրմութենէն»<sup>24</sup>:

Հայաստանում ևս թագավորական իշխանության և քրմական դասի միջև գոյություն ունեցած սերտ հարաբերությունների մասին վկայող մի շարք ցուցումներ կան Խորենացու մոտ: Հայտնի են պատմահոր վկայություններն այն մասին, թե հայոց թագավորներն իրենց ազգակիցներին էին հանձնարարում կրոնական ծեսերի կատարումը: Այսպես, «Արայեանն Արայ մեռանի ընդ Եամիրամայ ի պատերազմին, թողլով արու զաւակ ամենահարուստ և շատահանճար յիր և ի բան՝ զԱնուշաւանն Սօսանուէր: Քանզի ձօնեալ էր ըստ պաշտամանց ի սօսիսն Արամանեկայ որ յԱրմաիր»<sup>25</sup>: Խորենացին հաղորդում է նաև, որ Երվանդը «մեհեանս շինեալ, զեղբայր իր զԵրուազ քրմապետ կացուցանէր»<sup>26</sup>: Խորենացու մեկ ուրիշ հաղորդման համաձայն, Արտաշեսը «գտեալ յԱսիոյ պղնձաձոյլ ոսկեզօծ պատկերս զԱրտեմիդեայ և զՀերակլեայ և զԱպողոնի, տայ բերել յաշխարհս մեր, զի կանգնեցեն յԱրմաիր: Զոր առեալ քրմապետացն, որ էին յազգէ Վահունեաց, զԱպողոնին և զԱրտեմիդայն կանգնեցին յԱրմաիր»<sup>27</sup>: Կա նաև Խորենացու վկայությունն այն մասին, թե Արտաշեսն իր որդիներից Մաժանին «կարգէ քրմապետ ի յԱնի դիցն Արամազդայ»<sup>28</sup>, իսկ Բագարանում՝ սպանված քրմապետ Երվազի փոխարեն Սմբատը «ի վերայ բազմացն կացուցանէ զընտանի Արտաշիսի»<sup>29</sup>: Այս առթիվ տեղին է հիշեցնել, որ Գառնիի հունարեն արձանագրության և Տակիստոսի վկայության համաձայն, նույն անձը միաժամանակ եղել է քուրմ և արքա:

Ինչպես Փոքր Ասիայի հելլենիստական երկրներում, Հայաստանում ևս նմանօրինակ հանձնարարություններն ուղեկցվում էին հարուստ նվիրատվություններով: Այլապես, դժվար կարելի է բացատրել Խորենացու հաղորդումն այն մասին, թե Արտաշես թագավորի սպարապետ Սմբատը «աւար առեալ զգանձսն Երուազայ, և ծառայս հինգ հարեւր, նաև զընտիր ընտիր գանձուցն մեհենից, բերէ Արտաշիսի»<sup>30</sup>: Քրմերի ձեռքին և հեթանոսական տաճարներում այդպիսի մեծ հարստություն կուտակվում էր ժամանակի ընթացքում տաճարներին շնորհված հողաչին և նյութական պարգևների միջոցով:

Տեղին է հիշել, որ Ագաթանգեղոսը, խոսելով Տարոնի Վահեվանյան մեհյանի մասին, այն համարում է «մեծագանձ, լի ոսկով և արծաթով, և բազում նուէրք մեծամեծ թագաւորաց ձօնեալ անդր»<sup>31</sup>:

Հողաչին նվիրատվություններ կարող էր անել նա, ով սեփականատերն էր այդ հողերի և կարող էր ազատորեն, ըստ իր հայեցողության, տնօրինել դրանք. իսկ այդպիսի անձնավորություն հանդիսանում էր ինքը՝ թագավորանք:

<sup>24</sup> Մովսէս Խորենացի, Բ, Ժդ:

<sup>25</sup> Անդ, Ա, ի:

<sup>26</sup> Անդ, Բ, խ:

<sup>27</sup> Անդ, Բ, Ժբ:

<sup>28</sup> Անդ, Բ, ծգ:

<sup>29</sup> Անդ, Բ, խը:

<sup>30</sup> Մովսէս Խորենացի, Բ, խը:

<sup>31</sup> Ագաթանգեղոս, ԾԺԴ, 809:

րը: Ուստի և տաճարներին ու առանձին մարդկանց հողային նվիրատվություններ անում էին գլխավորապես թագավորները: Նման բազմաթիվ փաստերի ենթ հանդիպում ինչպես Փոքր Ասիայի հելենիստական թագավորների՝ քաղաքներին հղած նամակներում, այնպես էլ անտիկ ու հայ մատենագիրների երկերում:

Նշենք այդ փաստերից մի քանիսը: Պերգամոնի թագավորներից մեկը Իլիոն քաղաքին հղած իր նամակում հիշատակում է անասունների և հողային տարածության նվիրաբերման մասին Աթենաս դիցուհուն: Անասունների հետ, դրանք խնամելու համար, թագավորն ուղարկում է նաև հոտաղների<sup>32</sup>, որոնք տաճարի տնտեսության մեջ դառնալու էին տաճարային ծառաներ՝ հիերոդուլներ: Մ.թ.ա. Բ դարի վերջերին թագավորած Անտիոքոսներից մեկին վերագրվող մեկ այլ նամակ, ուղղված բարձրաստիճան պաշտոնյաներից մեկին, վերաբերում է Բայտոկայեշում գտնվող Ջևսի տաճարին արված նվիրատվություններին: Այդ նամակում հաղորդվում է, որ թագավորը վերադարձնում է տաճարին այն հողերը, որ Սելևկյան թագավորները նախկինում վերցրել էին տաճարից և պարգևել մակեդոնացի պաշտոնյա Դեմետրիոսին<sup>33</sup>: Հելլենիստական աշխարհի թագավորները տաճարներին և նրանց սպասավորներին, քրմերին, նվիրում էին ոչ միայն հողային տիրույթներ, այլև ուրիշ ունեցվածք, շարժական և անշարժ: Այսպես, Ստտալոս Ա-ի նամակը քրմական պաշտոնի հաստատման պայմանների մասին, ուղղված մի պաշտոնյայի, հավաստում է, թե քուրմը պետք է իբր նվիրատվություն և լրացուցիչ վարձ ստանա զոհաբերվող անասունների մորթին և զիստը, նաև այն արհեստանոցների եկամուտը, որոնք թագավորը նվիրել է տաճարին<sup>34</sup>:

Թագավորի կողմից սրբավայրերին արված հողային նվիրատվությունների մասին անժխտելի վկայություններ կան Կոմմագենեի Նեմրոդ լեռան հայտնի արձանագրությունում, որտեղ այդ ոչ մեծ թագավորության գահակալ Անտիոքոս Ա-ն պատմում է աստվածների, հերոս նախնիների և իր՝ թագավորի պաշտամունքի կազմակերպման մասին: Այն սպասարկելու համար հաստատված էին քրմեր և տաճարային ստրուկներ: Սրբատեղին տնտեսապես ապահովելու համար թագավորը տաճարին նվիրել էր «բավարար քանակությամբ հողեր և դրանից ստացվող կաշուն եկամուտ»<sup>35</sup>:

Այս կապակցությամբ ուշադրության արժանի է մեկ այլ նամակ ևս, որը հասցեագրել է Սելևկոս Ա-ն Միլետ քաղաքին, որով հաղորդում է Դիոփմեյան Ապոլլոնի տաճարին իր ուղարկած թանկարժեք նվերների մասին: Նամակին կցված է հետաքրքիր ցուցակ, որում մանրամասն թվարկված են Սելևկոսի ուղարկած ընծաները Ապոլլոնի տաճարին<sup>36</sup>:

Այս նամակների և Արմավիրի թիվ 3 հունարեն արձանագրության համադրումը որոշ չափով կպարզի վերջինիս բնույթը: Ա. Ի. Բոլտունովան հետևյալ կերպ է ընթերցում այդ արձանագրությունը.

<sup>32</sup> C. B. Welles, RC, No. 62.

<sup>33</sup> Անդ, 70:

<sup>34</sup> Անդ, 24:

<sup>35</sup> K. Humann und O. Puchstein, Reisen in Kleinasien und Nordsyrien, Berlin, 1890, S. 265.

<sup>36</sup> C. B. Welles, RC, 5.

τέτταρες  
ἵπποι τὸ ζεῦγος  
Σύθουχαρμί(δης)  
πινάχιον εἰ(ν)  
Πηλαμίδος

և այն համարում է Արմավիրի տաճարին արված նվիրաբերությունների թվարկում և թարգմանում է՝ «Չորս ձի, կառք, որ նվիրաբերել է Եվթիքարմիդեսը և ոչ մեծ մի պատկեր, որը նվիրաբերել է Պելամիդեսը»<sup>37</sup>: Իսկ Կ. Վ. Տրեվերը առաջարկում է այն կարդալ՝

τέτταρες  
ἵπποι τὸ ζεῦγος  
εὐθὺ Χάρμι  
πινάχιον εἰ(μι)  
Πηλαμόδο(υ)

և տալիս է հետևյալ, առաջինից բխողովին տարբեր թարգմանությունը. «Չորս ձի (և) կառք (նվիրված) Հարմային, տախտակն էմ Պելամիդեսի»<sup>38</sup>: Կ. Վ. Տրեվերը ենթադրում է, որ այս արձանագրությունը ևս, Արմավիրի մյուս արձանագրությունների նման, ունի ընծայաբերական բնույթ կամ թե հատված է գրական ինչ-որ երկից<sup>39</sup>:

Առավել ընդունելի է Ա. Ի. Բոլտունովայի՝ արձանագրության բառերը իրենց ուղիղ իմաստով վերցնելը. ինչո՞ւ այդ բառերի մեջ փնտրել խորհրդանշական կամ փոխաբերական իմաստ, ինչպես այդ անում է Կ. Տրեվերը, այն ժամանակ, երբ դրանք ուղիղ իմաստով վերցնելը լիովին բանական է և չի հակասում պատմական իրականությանը: Տվյալ արձանագրության ընդհանուր իմաստն այն է, որ ոմն Եվթիքարմիդես ընծայաբերում է տաճարին չորս ձի և կառք, իսկ Պելամիդեսը՝ պնակ (πινάχιον):

Այս արձանագրության առաջին մասի բնույթի վերաբերյալ կարելի է երեք ենթադրություն անել: Առաջինը բխում է Ստրաբոնի այն վկայությունից, թե Հայաստանը հարուստ է եղել ձիաբուծության համար հարմար արոտավայրերով, որ Հայաստանի սատրապը ամեն տարի պարսից արքային ուղարկում էր քսան հազար մտրուկ՝ Միհրական տոների համար<sup>40</sup>: Արմավիրի տաճարը, հավանաբար, նվիրված էր Միհրին: Ուստի բնական է ենթադրել, որ արձանագրության մեջ հիշատակված չորս ձիերը ընծայվել էին տաճարին, Միհրի տոնակատարության ժամանակ զոհաբերելու համար: Այս դեպքում, սակայն, անբացատրելի է մնում ձիերի հետ կառքի նվիրաբերումը: Ուստի բացառված չէ նաև երկրորդ ենթադրությունը, որ չորս ձիերը և կառքը նվիրաբերված էին տաճարային տնտեսության մեջ օգտագործելու համար: Հնարավոր է նաև մի երրորդ ենթադրություն, որ այս արձանագրությունը եղել է տաճարային տնտեսության ունեցվածքի

<sup>37</sup> А. И. Болтунова, Греческие надписи Армавира, Армавирский Стеллярий, 1942, թիվ 1—1, էջ 42:

<sup>38</sup> К. В. Тревер, Очерки по истории культуры древней Армении, М.—Л., 1953, стр. 132.

<sup>39</sup> Անդ, էջ 132 և 156:

<sup>40</sup> Strabo, XI, 13, 7. XI, 14, 9.

գույքագրության ցուցակից մի հատված: Այնուամենայնիվ, այս դեպքում ևս Եվթիբարմիդեսը և Պելամիդեսը մնում են թվարկված իրերի նվիրաբերողները:

Փոքր Ասիայում և Արևելքի մյուս երկրներում տաճարներն ունեին հողային ընդարձակ տիրույթներ: Ստրաբոնը հաղորդում է, որ Կապադովկիայի Կոմանա քաղաքում գտնվող Մա դիցուհու տաճարին կից կա մեծ հողամաս<sup>41</sup>, որ Վենապյան Զևսի տաճարին առընթեր Մորիմենա քաղաքում կա «բարեբեր սրբազան հողամաս»<sup>42</sup>, որ Ադվանքում քուրմը «կանգնած է ընդարձակ և լավ բնակեցված սրբազան հողի գլուխ»<sup>43</sup>: Նույն դրություներ պետք է եղած լինեին նաև Հայաստանում: Ագաթանգեղոսը հաղորդում է, որ Տրդատ Մեծի հայրը, հայոց Խոսրով թագավորը, Սասանյան Պարսկաստանի դեմ տարած հաղթանակից հետո, վերադարձավ հարուստ ավարով, որի հինգերորդ մասը նա պարգևեց քրմերին<sup>44</sup>: Նույն Ագաթանգեղոսը վկայում է, որ Արտաշատում գտնվող Անահիտ դիցուհու տաճարը ավերելուց հետո, Տրդատ թագավորն ու Գրիգոր Լուսավորիչը հեթանոսական այդ տաճարին պատկանող ինչքը նվիրեցին եկեղեցուն—«Եւ զդաստակերտսն և զսպասատրսն քրմօքն հանդերձ և՛ նոցին գետնովքն և սահմանօքն ի ծառայութիւն նուիրեցին եկեղեցոյ սպասատրութեան»<sup>45</sup>: Այնուհետև, Ագաթանգեղոսը վկայում է Հայաստանի հեթանոսական մյուս տաճարների ինչքի բռնագրավման մասին հօգուտ քրիստոնեական նորաստեղծ եկեղեցու:

Ագաթանգեղոսի հաղորդման արժանահավատությունը հաստատվում է Փավստոս Բուզանդի տվյալներով: Վերջինս Պապ թագավորին (367—380 թթ.) մեղադրելիս, իմիջիայոց խոսում է նրա ձեռնարկած բարենորոգումների մասին, որոնցից մեկն էլ այն էր, որ թագավորը բռնագրավում էր մի մասը եկեղեցապատկան այն հողերի, որ Տրդատ Մեծը վերցրել էր հեթանոսական տաճարներից և պարգևել եկեղեցու սպասավորներին<sup>46</sup>: Մենք ունենք նաև պատմահոր այն վկայությունը, թե Տիգրան թագավորը «ցասուցեալ ընդ Վահունիսն,.... ընկենու զնոսա ի քրմութենէն, և զգեղն յարքունիս առնու»<sup>47</sup>:

Այս վկայությունների կողքին մեկ անգամ ևս հիշատակենք մ.թ.ա. Բ դարի վերջերին գահակալած Անտիոքոսներից մեկի նամակն այն մասին, որ թագավորը վերադարձնում է Զևսի տաճարին նրա հողային նախկին տիրույթները: Այս դեպքում անկասկած է, որ Սելևկյան թագավորները իրենց տիրապետության սկզբնական շրջանում այդ տաճարից վերցրել էին նշանակալից հողային տարածություններ: Այս ամենից հետո, դժվար չէ կուսիել, որ թագավորական իշխանության փոխհարաբերությունը քրմական դասի հետ ոչ բոլոր դեպքերում էր բարեկամական:

Այսպիսին էր իրադրությունը ոչ միայն Հայաստանի պաշտամունքային կենտրոնի՝ Արմավիրի տաճարում, այլև երկրի մյուս մասերում և քաղաքներում: Եկեղյաց գավառում մի ամբողջ շրջան է հայտնի, որն այնտեղ գտնվող Անահիտ դիցուհու տաճարի անունով հայերը կոչել են Անահտա-

<sup>41</sup> Անդ, XII, 2, 3:

<sup>42</sup> Անդ, XII, 2, 5:

<sup>43</sup> Անդ, XI, 4, 7:

<sup>44</sup> Ագաթանգեղոս, Ա, 22:

<sup>45</sup> Ագաթանգեղոս, ՃԸ, 731:

<sup>46</sup> Փավստոս Բուզանդ, Ե, լա:

<sup>47</sup> Մովսես Խորենացի, Բ, ժդ:

կան երկիր: Պոտարքոսը հաղորդում է, որ այդ երկրի ընդարձակ արտավայրերում արածում էին հատուկ գույնի կովեր, որոնք նվիրաբերված էին դիցուհուն<sup>48</sup>:

Մայրաքաղաք Արտաշատը ևս, հին աշխարհի բոլոր մեծ քաղաքների մեջ, ունեցել է իր հովանավոր դիցուհուն՝ Անահիտին, որի պատվին քաղաքում կառուցված է եղել տաճար<sup>49</sup>: Անկասկած, իրենց հովանավոր աստվածներին նվիրված տաճարներ կային նաև Հայաստանի այնպիսի քաղաքներում, ինչպիսիք Երվանդաշատը, Բագարանը, Բագավանը, Տիգրանակերտը և այլն:

Քրմապետի իրավասությունները չէին սահմանափակվում սուկ պաշտամունքային արարողությունների կատարումով և տաճարային տնտեսությունների վերահսկողությամբ: Ամենայն հավանականությամբ, հեթանոսական Հայաստանում քրմապետն ունեցել է նաև մի բացառիկ իրավունք՝ հայոց թագավորին թագադրելու իրավունքը: Իսկ սա ուներ բացառիկ կարեւորություն, քանզի առանց թագադրումի արարողության թագավորական իշխանությունը ապօրինի կհամարվեր: Հավանաբար այս հանգամանքը նկատի ունի Խորենացին, երբ, անդրադառնալով Երվանդի գահակալությանը, գրում է. «Եւ ի մեռեալն Սանատրկոյ՝ միաբանեալ թագաորեցոցին զնա, առանց արանց յազգէն Բագրատունեաց լինել թագադիր»<sup>50</sup>: Թագադրման արարողությունը տեղի էր ունենում հայտնի սրբավայրերից մեկում: Այդպիսի սրբավայրում, հավանաբար, թագադրվել էր Տիգրան Բ-ն, որտեղ և հետագայում նա կառուցեց իր քաղաքը, Տիգրանակերտը:

Հայոց թագավորին թագադրելու իրավունքը վերապահված էր Բագրատունյաց տոհմին: Բագրատունի անվան առաջին բաղկացուցիչ մասը— «բագ» — ինքնին հուշում է այն մասին, որ Բագրատունիները սկզբնական շրջանում պատկանելիս են եղել քրմական դասին<sup>51</sup>: Այս հանգամանքն էլ մեզ հանգեցրել է վերոբերյալ ենթադրության, թե հայոց թագավորին թագադրում էր քրմապետը:

Արևելքի երկրներում քրմական դասի ձեռքին է եղել նաև դատական իշխանությունը: Դեռ ավելին: Երբեմն քրմապետ դատավորը հանդիսացել է նաև երկրի գերագույն իշխանավորը և աշխարհագործի առաջնորդը: Աստվածաշնչում կա մի ամբողջ գիրք, որտեղ նկարագրվում է պատմական այն դարաշրջանը, երբ հրեաները դեռ թագավոր չունեին և երկրի գերագույն իշխանությունը գտնվում էր քահանայապետ-դատավորի ձեռքին, որը միաժամանակ պատերազմի ընթացքում հանդիսանում էր հրեաների ռազմական առաջնորդը<sup>52</sup>:

Ըստ երևույթին, հեթանոսական Հայաստանում ևս քրմապետի ձեռքին է եղել դատավորական իշխանությունը, որը հետագայում ժառանգաբար

<sup>48</sup> Plutarchi Lucullus, XXIV, 2—8.

<sup>49</sup> Հմմտ. Մովսես Խորենացի, Բ, խթ:

<sup>50</sup> Մովսես Խորենացի, Բ, լե:

<sup>51</sup> Իրավացի է Ա. Մ. Գարազաշյանը (Քննական Պատմություն Հայոց, մ. Ա, Թիֆլիս, 1895, էջ 178) երբ գրում է. «Ըստ մեզ թագավոր պսակելն առ հայս ոչ միայն վաղեմի սովորություն էր, ... այլև թերևս կրոնական արարողություն, և Բագրատունիք... էին թերևս քրմական ցեղ ի մեջ Հայոց: ... Այսպես ենթադրելու բավական պատճառ կուտա մեզ Բագրատունի անվան առաջին բառը՝ բագ, որ հնդեվրոպական լեզվաց շատերուն մեջ կա և կնշանակե՝ դիր կամ աստված»:

<sup>52</sup> Գիրք Դատաւորաց, Բ, 16—19: Գ, 10: Դ, 4—24: ԺԱ—ԺԶ:

անցել է հայոց կաթողիկոսին: Ինչպես վկայում է պատմահայրը, հայկական եկեղեցու գլուխ կանգնած կաթողիկոսը միևնույն ժամանակ վարում էր «մեծ դատավարության գործակալությունը»: Նորաստեղծ քրիստոնեական եկեղեցին Հայաստանում հեթանոսական տաճարներից ժառանգեց ոչ միայն նրանց շարժական և անշարժ ունեցվածքը, այլև քրմերի մինչ այդ ունեցած արտոնությունները, այդ թվում նաև դատական իշխանությունը:

Վերջապես, Արևելքում քրմապետը հաճախ հանդիսանում էր նաև ամբողջ մարզի քաղաքական կառավարիչը, ստրատեգոսը: Այդ մասին մեզ հասել է հետաքրքիր մի վկայություն, որի վավերականությունը ամեն կասկածից վեր է: Դա Կապադովկիայի Կոմանա քաղաքում գտնված Մա դիցուհու տաճարի քրմապետի պատվին ընդունված մեծարման որոշումն է, որը մեզ է հասել արձանագրության ձևով: Դրանում ասված է. «Կատաոնացիները, որոնք ապրում են Կոմանա սրբազան քաղաքում, Տրիտանտեքմեսին, Յագիմոսի որդուն Նիկեփորոս դիցուհու քրմին և Կատաոնիայի ստրատեգոսին, որը նրանց կառավարում է զիջողաբար և բարեգործությամբ»<sup>53</sup>: Ինչպես տեսնում ենք, Կոմանայի քրմապետը միաժամանակ հանդիսանում է Կապադովկիայի տառը ստրատեգիացիներից մեկի, Կատաոնայի ստրատեգոս-կառավարիչը: Նշված արձանագրությունից բխող եզրակացությունը սերտորեն ձայնակցում է Ստրաբոնի հայտնի վկայությանը, թե Կոմանայի քրմապետը «թագավորից հետո երկրորդ անձնավորությունն է Կապադովկիայում»<sup>54</sup>:

Բոլոր հիմքերն ունենք ենթադրելու, որ քրմերը Հայաստանում ևս ունեցել են զինվորական իշխանություն: Այդ ենթադրության հիմքը հեթանոսության վերացման և քրիստոնեության տարածման ամբողջ պատմությունն է: Ազաթանգեղոսը վկայում է, որ քրիստոնեությունը միանգամից, խաղաղ ճանապարհով չէ, որ մտավ Հայաստան: Նոր վարդապետության դեմ պայքարելիս, հեթանոսության գլխավոր հենարանները տաճարներն էին, որոնք մեծ մասամբ ամրացված բերդեր էին և ունեին հատուկ զորական միավորումներ: Տրդատ թագավորն ու Գրիգոր Լուսավորիչը ստիպված էին մեծաթիվ զորքով արշավել այդ տաճարային կենտրոնների դեմ և մարտերով գրավել դրանք:

Հայաստանի տաճարային մի շարք կենտրոնների մասին խոսելիս, հայ մատենագիրները դրանք համարում են նույնիսկ ամրություններ: Ահա մի քանի օրինակ: Խորենացին Երվանդաշատի մոտ կառուցված Բագարան քաղաքը, որտեղ Երվանդը փոխադրեց Արմավիրում եղած բոլոր կուռքերը և այնտեղ մեհյաններ շինելով իր Երվազ եղբորը քրմապետ կարգեց, անվանում է «ամուրն Բագարան»<sup>55</sup>: Ազաթանգեղոսի վկայությամբ, Տրդատ թագավորն ու Գրիգոր Լուսավորիչը Եկեղյաց գավառի Անի-Կամախում գտնվող Արամազդի տաճարը ավերելուց հետո «զաւանն ամրականաւն հանդերձ ի ծառայութիւն եկեղեցոյ նուիրէին»<sup>56</sup>: Խորենացին այս Անին նույնպես անվանում է ամրոց<sup>57</sup>: Երիզա ավանը ևս, որտեղ գտնվում էր Ա-

<sup>53</sup> Արձանագրության հրատարակությունը տես W. Ramsay, The social basis of Roman power in Asia Minor, Aberdeen, 1941, p. 105—106.

<sup>54</sup> Strabo, XII, 2, 3.

<sup>55</sup> Մովսես Խորենացի, Բ, խը:

<sup>56</sup> Ազաթանգեղոս, ՄԹ, 785:

<sup>57</sup> Մովսես Խորենացի, Բ, ժբ:

նահիտ դիցուհու տաճարը, պատած էր բարձր պարիսպով և ցույց տվեց ուժեղ դիմադրություն Տրդատի և Լուսավորչի զորքերին<sup>58</sup>:

Հովհան Մամիկոնյանը հիշատակում է մի շարք պատերազմներ, որ մղել է Տարոնում գտնվող Գիսիանեի տաճարային կազմակերպությունը թագավորական զորքերի դեմ: Նրա հաղորդման համաձայն, տաճարապատկան ավաններից դուրս բերված զորքերը բաղկացած էին աղեղնավորներից, պարսավորներից և տիգավորներից<sup>59</sup>: Մեր աղբյուրներում պահպանված են ոչ քիչ տեղեկություններ այն մասին, որ Հայաստանում նորաստեղծ եկեղեցու առաջին ականավոր գործիչները միաժամանակ առնչվել են զինվորական ծառայության հետ: Այսպես, Փավստոս Բուզանդի վկայությամբ, Գրիգոր Լուսավորչի թոռները, Պապը և Աթանագիները, զբաղվում էին ուսման կազմակերպությամբ<sup>60</sup>: Դարձյալ Փավստոսի պատմությունից մեզ հայտնի է, որ Ներսես կաթողիկոսը, նախքան հայկական եկեղեցու քահանայապետ կարգվելը, եղել էր զինվորական<sup>61</sup>: Այս առնչությամբ առավել հետաքրքիր է Փավստոսի այն հաղորդումը, թե Զավեն եպիսկոպոսը ոչ միայն մտցրեց հոգևորականության ուսման կառավարման պատրաստականության հարցը, այլև առաջարկում էր հոգևորականներին կրել ուսման համազգեստ<sup>62</sup>: Մեզ հասել է վկայություն, թե մեծն Մաշտոցը ևս մի ժամանակ եղել է զինվորական<sup>63</sup>: Ա. Գ. Փերիխանյանը վերոհիշյալ փաստերի կապակցությամբ հիրավի նշում է, որ «քրիստոնեության սկզբնական շրջանում հայ հոգևորականության ներկայացուցիչների ուսման հակումները գուցե անհրաժեշտ է բացատրել որպես վերապրուկ նրա նախորդների՝ հայկական քրմական դասի ավանդների»<sup>64</sup>:

Ամբողջ շարադրվածից պարզ դարձավ, որ հեթանոսական Հայաստանում և Առաջավոր Ասիայի մյուս երկրներում քրմական դասը խոշոր դեր է ունեցել երկրի թե՛ ներքին տնտեսական և թե՛ մշակութային պաշտամունքային կյանքում: Քրմերի գործունեությունը, սակայն, չի սահմանափակվել այդքանով: Նրանք գործոն մասնակցություն են ունեցել նաև արտաքին, միջպետական հարաբերություններին: Այս առումով հետաքրքիր են երկու փաստ, մեկը մատենագրությունից, մյուսը վիմագրությունից:

Նկարագրելով Իբերիայի (Վրաստան) հասարակարգը, Ստրաբոնը գրում է. «Չորս դասի մարդիկ են բնակեցնում երկիրը: Դրանցից մեկն ամենակարևորն է, որից և թագավոր են կարգում, ծագումով (նախկին թագավորին) ամենամոտիկ և տարիքով ավագագույն անձին, իսկ նրանցից երկրորդը վարում է դատական գործերը և առաջնորդում է զորքը: Երկրորդը քրմերի դասն է, որին հանձնված է հարևանների հետ հարաբերություններ վարելու գործը: Երրորդը ուսմիկներն են և հողագործները: Չորրորդ դասը ժողովուրդն է. նրանք հանդիսանում են արքունի ստրուկներ և արտադրում են այն ամենը, ինչ անհրաժեշտ է ապրելու համար»<sup>65</sup>:

<sup>58</sup> Ագաթանգեղոս, ԾԹ, 786:

<sup>59</sup> Հովհան Մամիկոնեան, Պատմութիւն Տարօնոյ, Երևան, 1941, էջ 110—112:

<sup>60</sup> Փավստոս Բուզանդ, Գ, ծգ:

<sup>61</sup> Անդ, Դ, գ:

<sup>62</sup> Անդ, Դ, բ:

<sup>63</sup> Կորիւն, Պատմութիւն վարուց և մահուան Մեսրոպայ Վարդապետի, Վենետիկ, 1894,

էջ 13—14:

<sup>64</sup> А. Г. Периханян, Храмовые объединения Малой Азии и Армении, М., 1959, стр. 80—81.

<sup>65</sup> Strabo, XI, 3, 6.

Ստրաբոնի այս հաղորդման մեջ նրա վկայությունը Իբերիայի քրմական դասի մասին, անշուշտ, չի կարելի հասկանալ այն տառացի իմաստով, որ երկրի արտաքին հարաբերությունների հարցերը վճռելու իրավունքը վերապահված էր բացառապես քրմերին: Արտաքին քաղաքականության հարցերը, անկասկած, բոլոր դեպքերում պետք է, որ լուծեր ինքը, երկրի գերագույն տերը համարվող թագավորը, իր իսկ հայեցողությամբ: Ստրաբոնի վկայության իմաստն այն է, որ թագավորը քրմերին հանձնարարում էր արտաքին քաղաքականության հարցերի մասին հոգալը:

Մեր ակնարկած մյուս փաստը վիմական արձանագրությունների այն ամբողջ համալիրն է, որը հայտնաբերվել է Գալատիայի տաճարային կենտրոն Պեսսինունտում: Դրանցում պահպանված է այն նամակագրությունը, որ ժամանակի միջազգային քաղաքական բարդ պայմաններում ունեցել են Պերգամոնի թագավորները Կյուրեղեի տաճարի քրմապետ Ատտիսի հետ: Նախորդ էջերում մենք հանգամանորեն անդրադարձել ենք այդ արձանագրություններին, որոնց վերլուծությունը նույնպես մեզ հանգեցրել է այն եզրակացության, թե քրմապետերը նշանակալից դեր են խաղացել հելլենիստական տերությունների միջպետական հարաբերություններում:

Այսպիսով, քրմապետերը, բոլոր դեպքերում, ունեցել են բարձր հեղինակություն և համարվել են թագավորի մերձավորագույն մարդիկ, միաժամանակ իրենց պաշտոնը վարելով ցմահ: Հայաստանում ևս, ինչպես և հելլենիստական մյուս երկրներում, թագավորները տաճարներին և դրանք սպասարկող քրմերին նվիրել են հողային ընդարձակ տիրույթներ, դրանց վրա աշխատող անմիջական արտադրողների հոծ զանգվածով, որը և կազմում էր քրմական դասի տնտեսական և քաղաքական հզորության գլխավոր աղբյուրը:

Քրիստոնեության ընդունումից հետո, նորաստեղծ եկեղեցին Հայաստանում ժառանգեց հեթանոսական տաճարների ոչ միայն ամբողջ հարբատությունը, այլև բոլոր այն առանձնաշնորհումները, որ նախապես վայելում էին քրմերը: Դրանով էլ, այնուհետև, քրիստոնեական եկեղեցին դառնում է Հայաստանի քաղաքական, տնտեսական և մշակութային կյանքի ամենակարևոր գործոններից մեկը:

ՍԻՄՈՆ Մ. ԿՐԿՅԱՇԱՐՅԱՆ  
Պատմական գիտությունների դոկտոր

